



Broj: 01-50-1-1263-3/14
Sarajevo, 15.1.2015.

БОСНА И ХЕРЦЕГОВИНА
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ
SARAJEVO

PRIMLJENO: 26. 1. 2015.			
Organizaciona jedinica	Klasifikaciona oznaka	Redni broj	Broj priloga

B

ZAPISNIK
3. sjednice Predstavničkog doma
Parlamentarne skupštine Bosne i Hercegovine,
održane 15. 1. 2015. godine

Sjednica je počela u 10,05 sati. Prisustvovali su svi poslanici.¹

Sjednici su prisustvovali predsjedavajući i članovi Vijeća ministara BiH.

Sjednici je prisustvovala direktorica Izvozno-kreditne agencije BiH.

Iz međunarodnih organizacija sjednicu su pratili predstavnici OHR-a i EUSR-a. Također, sjednicu su pratili predstavnici američke i britanske ambasade, a iz nevladinih organizacija prisustvovao je predstavnik CCI-ja.

Predsjedavajući Doma Šefik Džaferović rekao je da će poslanicima, u skladu s članom 171. Poslovnika, na početku sjednice, prije rasprave o dnevnom redu, biti omogućeno postavljanje poslaničkih pitanja u usmenoj formi. Predsjedavajući je podsjetio da su poslanicima, 25.12. 2014. i 8.1.2015., upućeni dopisi u vezi s procedurom postavljanja poslaničkih pitanja u usmenoj formi. Dana 8. 1. 2015. upućen je dopis i predsjedavajućem Vijeća ministara BiH, u kojem su navedene odredbe Poslovnika kojima je regulirana procedura postavljanja poslaničkih pitanja u usmenoj formi (čl. 170. – 173. Poslovnika).

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- Šefik Džaferović – za ministra pravde BiH,
- Nermina Kapetanović – za ministra za ljudska prava i izbjeglice BiH,
- Mladen Bosić – za predsjedavajućeg Vijeća ministara BiH,
- Aleksandra Pandurević – za ministra vanjske trgovine i ekonomskih odnosa BiH,
- Dušanka Majkić – za ministra vanjskih poslova BiH,
- Salko Sokolović – za predsjedavajućeg Vijeća ministara BiH i ministra vanjske trgovine i ekonomskih odnosa BiH,
- Saša Magazinović – za ministra sigurnosti BiH i ministra pravde BiH i
- Šemsudin Mehmedović – za predsjedavajućeg Vijeća ministara BiH.

Ove najave su, u skladu s članom 172. Poslovnika, dostavljene predsjedavajućem Vijeća ministara BiH i onom članu Vijeća ministara BiH na koga se pitanje odnosi. Predsjedavajući je podsjetio da je osiguran i direktan TV prijenos ovog dijela sjednice, u skladu s članom 171. stav (1) Poslovnika.

¹ Sjednicu su nakon rasprave o dnevnom redu napustili poslanici iz Kluba SNSD-a, a zatim i poslanici iz Kluba SBB-a BiH.

Nakon ovih napomena, pristupilo se usmenom postavljanju poslaničkih pitanja i davanju odgovora redoslijedom dostavljanja najava.

Šefik Džaferović

Pitanje upućeno ministru pravde BiH: „Šta su uradili Ministarstvo pravde BiH i Vijeće ministara BiH na provođenju Odluke Ustavnog suda BiH br. U1/11 od 13.7.2012., koja se odnosi na temu državne imovine BiH? Da li je Ministarstvo pravde BiH sačinilo plan provođenja Odluke Ustavnog suda BiH br. U1/11 od 13.7.2012., a ako nije, kada će i da li namjerava uputiti u parlamentarnu proceduru sve zakone koji bi značili provođenje ove odluke?“

- *Odgovor na pitanje dao je ministar pravde BiH Bariša Čolak.* Poslanik Šefik Džaferović komentirao je odgovor, ali nije tražio dostavljanje odgovora u pisanoj formi.

Nermina Kapetanović

Pitanje upućeno ministru za ljudska prava i izbjeglice BiH: „Kada će Ministarstvo za ljudska prava i izbjeglice BiH, posredstvom Vijeća ministara BiH, dostaviti Parlamentarnoj skupštini BiH izvještaj o pojavama diskriminacije i u vezi s tim predložiti konkretne zakonodavne ili druge mjere?“

- *Odgovor na pitanje dao je ministar za ljudska prava i izbjeglice BiH Damir Ljubić.* Poslanica Nermina Kapetanović izrazila je nezadovoljstvo odgovorom, ali nije tražila dostavljanje odgovora u pisanoj formi.

Mladen Bosić

Pitanje upućeno predsjedavajućem Vijeća ministara BiH:

- „Šta je sa sredstvima u visini od 892.000.000 eura koje je Bosna i Hercegovina trebalo da dobije za sanaciju šteta od majskih poplava iz 2014. godine s donatorske konferencije održane u Briselu, u julu 2014.?“
- Koliko je Vijeće ministara BiH do sada odobrilo sredstava iz budžeta za sanaciju šteta od majskih poplava?
- Da li su odobrena sredstva operativna, koliko je sredstava do sada povučeno i za koje namjene su utrošena?“

- *Odgovor na pitanje dao je predsjedavajući Vijeća ministara BiH Vjekoslav Bevanda.* Poslanik Mladen Bosić komentirao je odgovor, ali nije tražio dostavljanje odgovora u pisanoj formi.

Aleksandra Pandurević

Pitanje upućeno ministru vanjske trgovine i ekonomskih odnosa BiH: „Znamo da je prošlo već godinu i po dana od ulaska Hrvatske u EU, u koju je Bosna i Hercegovina godišnje izvozila mlijeko u vrijednosti oko 22 miliona eura. Međutim, još uvijek, nažalost, naši proizvođači ne mogu da izvoze mlijeko u zemlje EU. Znamo da je u februaru prošle godine, čini mi se, bila misija iz Dablina i da smo dobili negativno mišljenje. S obzirom na to da je ministarstvo kojim Vi rukovodite to koje, rekla bih, na neki način krči put za izvoz i možda je glavni nosilac tih aktivnosti, molila bih Vas da nas informirate zašto prošle godine nije došlo do nekih očitih pomaka? Kada ponovo očekujemo misiju iz Dablina? Koje su to prepreke

koje treba da otklonimo i ima li šanse da to uskoro uradimo, pošto smo vidjeli da smo nedavno imali i proteste mljekara?“²

- *Odgovor na pitanje dao je ministar vanjske trgovine i ekonomskih odnosa BiH Boris Tučić.* Poslanica Aleksandra Pandurević izrazila je nezadovoljstvo datim odgovorom i tražila dostavljanje odgovora u pisanoj formi.

Dušanka Majkić

Pitanje upućeno ministru vanjskih poslova BiH: „Zašto Ministarstvo vanjskih poslova BiH nije ispoštovalo odredbe Zakona o kontroli vanjskotrgovinskog prometa robe i usluga od posebnog značaja za sigurnost Bosne i Hercegovine, s obzirom na to da se radi o zemlji oružanog sukoba, odnosno zašto je izdavanjem ovih saglasnosti prekršeno pravilo EU koje je usvojilo Vijeće ministara BiH 2010. godine, a koje se odnosi na to da je zabranjen izvoz oružja u sve zemlje u kojima postoji sukob ili povećane tenzije?“³

- *Odgovor na pitanje dao je ministar vanjskih poslova BiH Zlatko Lagumdžija.* Poslanica Dušanka Majkić izrazila je nezadovoljstvo datim odgovorom i tražila dostavljanje odgovora u pisanoj formi.

Salko Sokolović

Pitanje upućeno predsjedavajućem Vijeća ministara BiH i ministru vanjske trgovine i ekonomskih odnosa BiH: „Moje pitanje odnosi se na blokadu graničnih prijelaza i nemogućnost izvoza prehrambenih proizvoda, nešto slično, ali možda malo detaljnije, pitanju koje je postavila gospođa Pandurević. S obzirom na to da su posljednja dešavanja i blokade graničnih prijelaza od strane Udruženja poljoprivrednika bila opravdana, a smatram da su proizvod nerada i nemara Ministarstva vanjske trgovine i ekonomskih odnosa i Ureda za veterinarstvo koji djeluje u okviru Ministarstva vanjske trgovine i ekonomskih odnosa, postavljam ovo pitanje. Argumentirano je na takav način i s obzirom na to da smo se u Parlamentarnoj skupštini BiH bavili ovom problematikom. Želim vas podsjetiti da smo donijeli zaključke Parlamentarne skupštine BiH na 53. sjednici, koji su, na neki način, usklađeni sa zaključcima Vijeća ministara BiH s 25., 51. i 58. sjednice, a odnose se na hitnu potrebu rješavanja pitanja iz oblasti sigurnosti hrane i veterinarstva koji imaju negativan uticaj na izvoz hrane iz Bosne i Hercegovine na tržišta susjedne Hrvatske i EU. Kako je Vijeće ministara BiH svojim zaključkom s 25. sjednice, održane 29.10.2012., zadužilo Ministarstvo vanjske trgovine i ekonomskih odnosa BiH da formira interesornu radnu grupu i pripremi nove zakone o hrani, veterinarstvu i poljoprivredi, moje pitanje ili set pitanja koja se vežu za istu tematiku glasi – da li je interesorna radna grupa radila nacрте novih zakona o hrani, veterinarstvu i poljoprivredi? Da li je tim tekstovima zakona jasno određen centralni nadležni organ za pitanje veterinarstva i sigurnosti hrane? Ako su urađeni, kada će ih Vijeće ministara BiH razmatrati, odnosno kada će biti upućeni u parlamentarnu proceduru da se Parlamentarna skupština BiH i Predstavnički dom odrede o njima, jer oni su vrlo bitni za daljnje aktivnosti.“⁴

² Dio neautoriziranog transkripta 3. sjednice Predstavničkog doma.

³ Dio neautoriziranog transkripta 3. sjednice Predstavničkog doma.

⁴ Dio neautoriziranog transkripta 3. sjednice Predstavničkog doma.

- Odgovor na pitanje dao je ministar vanjske trgovine i ekonomskih odnosa BiH Boris Tučić. Poslanik Salko Sokolović izrazio je nezadovoljstvo datim odgovorom i tražio dostavljanje odgovora u pisanoj formi.

Saša Magazinović

Pitanje upućeno ministru sigurnosti BiH i ministru pravde BiH: „Konkretno, moja inicijativa, odnosno pitanje je sljedeće: Već duže vrijeme, a naročito u posljednje vrijeme, mediji izvještavaju o ekspanziji različitih oblika ekstremizma na internetu, posebno u komentarima na vijesti na internetskim portalima i na društvenim mrežama, u kojima se sve češće mogu vidjeti pozivi na ubistva, pozivi na međuetničke sukobe, ubijanje pripadnika manjinskih grupa, nacionalnu netrpeljivost i druge oblike nasilja i mržnje. Interesantno je da, posebno kad su društvene mreže u pitanju, većina osoba to radi ne krijući lični identitet, pa čak i nudeći više podataka o sebi. S druge strane, obaviješteni smo o aktivnostima koje provode pravosudne policijske strukture u Bosni i Hercegovini po ovom pitanju i konkretnim rezultatima, ukoliko postoje, na suzbijanju ovakvih pojava, kao i preventivnom djelovanju u odnosu na moguće tragične posljedice. Također, javnost nije obaviještena o kapacitetima policijskih struktura da se suprotstavi tiraniji ekstrema i zaplašivanju javnosti koja je sve prisutnija, kao ni o načinima da građani sami pomognu tome, prije svega znajući da će njihov trud i građanska odgovornost imati konkretan rezultat. Smatram da bi, umjesto što se policija i tužilaštvo bave represijom nad medijima, što ilustrira nedavni slučaj pretresa redakcije portala Klix.ba, o čemu ćemo, nadam se, danas u toku sjednice imati priliku više govoriti, trebali svoju energiju maksimalno usmjeriti u pravcu preventivnog djelovanja nad ekstremistima koji pred njihovim očima i očima svekolike javnosti otvoreno pozivaju na nasilje i mržnju i stvaraju atmosferu straha i nesigurnosti. Konkretna pitanja za Ministarstvo pravde BiH – da li je postojeća zakonska regulativa dostatna za konkretne aktivnosti u pravcu procesuiranja i kažnjavanja takvih pojava? Da li postoje neke aktivnosti koje se provode u pravcu izrade novih zakona, unapređenje postojećih i slično?“⁵

- Odgovor na pitanje dao je ministar pravde BiH Bariša Čolak. Poslanik Saša Magazinović izrazio je nezadovoljstvo datim odgovorom i tražio dostavljanje odgovora u pisanoj formi od oba ministra kojima je uputio pitanje.

Šemsudin Mehmedović

Pitanje upućeno predsjedavajućem Vijeća ministara BiH:

„Šta planira predsjedavajući Vijeća ministara BiH, zajedno s ove tri institucije (Centralna banka BiH, Agencija za bankarstvo Federacije BiH i Agencija za bankarstvo Republike Srpske), uraditi da zaštiti domaće privredne subjekte od njihovog planskog uništavanja od banaka koje ili ne daju kredite za proizvodnju ili već postojeće problematiziraju do te mjere da im je očigledno cilj samo preuzimanje hipoteke? Ovim se gasi ionako slaba bh. privreda.“

- Predsjedavajući Vijeća ministara BiH Vjekoslav Bevanda rekao da će odgovor dati čim dobije informacije od nadležnih institucija. Predsjedavajući Doma Šefik Džaferović konstatirao da će, u skladu s članom 173. stav (1) Poslovnika, odgovor na navedeno pitanje biti dat na prvoj narednoj sjednici Doma, u vrijeme određeno za postavljanje poslaničkih pitanja u usmenoj formi.

Zatim je predsjedavajući podsjetio na izmjene dnevnog reda sjednice Doma, kako slijedi:

⁵ Dio neautoriziranog transkripta 3. sjednice Predstavničkog doma.

S ranije utvrđenog dnevnog reda skinute su:

- **Tačka 2.** - Prijedlog zakona o izmjenama i dopunama Zakona o zrakoplovstvu BiH, predlađač: poslanik Mirsad Mešić, zakon broj: 01-02-1-28/14, od 12.6.2014. (drugo čitanje) - na zahtjev Komisije za saobraćaj i komunikacije, koja je tražila produženje roka za dostavljanje izvještaja. Komisija je predložila Kolegiju Doma da od Vijeća ministara BiH ponovo zatraži dostavljanje mišljenja i konstatirala da bi bilo svrsishodno produžiti amandmansku fazu kako bi se eventualni nedostaci mogli ispraviti ulaganjem amandmana. Kolegij je odobrio produženje roka za 20 dana;
- **Tačka 4.** - Prijedlog zakona o obligacionim odnosima u civilnom zrakoplovstvu BiH, predlađač: Vijeće ministara BiH, zakon broj: 01,02-02-1-33/14, od 24.7.2014. (drugo čitanje) - na zahtjev Ustavnopravne komisije, koja je tražila produženje roka za dostavljanje izvještaja za 20 dana kako bi predlađač zakona, u saradnji s Uredom sekretara Ustavnopravne komisije i Odjelom za lektoriranje, pripremio ispravke uočenih normativno-tehničkih grešaka u tekstu Prijedloga zakona. Kolegij je odobrio produženje roka za 20 dana;
- **Tačka 5.** - Prijedlog zakona o carinskoj politici u BiH, predlađač: Vijeće ministara BiH, zakon broj: 01,02-02-1-35/14, od 15.9.2014. (drugo čitanje) - na zahtjev Komisije za vanjsku trgovinu i carine, koja je tražila produženje roka za dostavljanje izvještaja, jer nije razmatrala Prijedlog zakona zbog odsustva predlađača. Kolegij je odobrio produženje roka za 20 dana;
- **Tačka 6.** - Prijedlog odluke o usvajanju Okvirne saobraćajne politike Bosne i Hercegovine za period od 2014. do 2020. godine, materijal Vijeća ministara BiH, broj: 01,02-29-1051/14, od 23.9.2014. - na zahtjev Komisije za saobraćaj i komunikacije. Komisija je predložila Kolegiju da Vijeću ministara BiH vrati Prijedlog odluke, kako bi novi saziv Vijeća ministara BiH postupio po zaključku Doma sa 62. sjednice, održane 23.1.2014.
- **Tačke:**
 - **15.** - Davanje saglasnosti za ratifikaciju Sporazuma o osnivanju Centra za razvoj finansija (CEF), broj: 01,02-05-2-1165/14, od 30.10.2014.,
 - **20.** - Davanje saglasnosti za ratifikaciju Dopune broj 2 Finansijskog sporazuma koji se odnosi na državni program za Bosnu i Hercegovinu u okviru IPA komponente - pomoć u tranziciji i izgradnji institucija za 2011. godinu - između Bosne i Hercegovine i Evropske unije, koju predstavlja Evropska komisija, broj: 01,02-05-2-1182/14, od 6.11.2014. i
 - **21.** - Davanje saglasnosti za ratifikaciju Dopune broj 2 Sporazuma o finansiranju koji se odnosi na državni program za Bosnu i Hercegovinu u okviru IPA komponente - pomoć u tranziciji i izgradnji institucija za 2012. godinu - između Bosne i Hercegovine i Evropske unije, koju predstavlja Evropska komisija, broj: 01,02-05-2-1180/14, od 6.11.2014. - skinute su na zahtjev Komisije za vanjske poslove, koja je odgodila izjašnjavanje o njima, te zatražila dodatne informacije od relevantnih institucija ovlaštenih za navedene sporazume.

U raspravi o dnevnom redu učestvovali su: Denis Bećirović, Mirsad Đonlagić, Staša Košarac, Aleksandra Pandurević, Asim Sarajlić, Dušanka Majkić, Fehim Škaljić, Nermina Kapetanović, Milica Marković, Momčilo Novaković, Šefik Džaferović, Lazar Prodanović, Senad Šepić, Nikola Špirić, Miroslav Milovanović, Mladen Bosić, Saša Magazinović, Željko Komšić i Diana Zelenika.

Nakon rasprave pristupilo se glasanju o prijedlozima za dopunu dnevnog reda sjednice.

Prijedlog poslanika Denisa Bećirovića za dopunu dnevnog reda tačkom koja glasi: „Razmatranje pritisaka na slobodu informiranja i slobodu medija u Bosni i Hercegovini, s posebnim osvrtom na policijski pretres i blokiranje redakcije portala *klix.ba*“ usvojen je s 30 glasova „za“ (iz Federacije BiH 23, iz Republike Srpske sedam), bez glasova „protiv“ i devet glasova „suzdržan“. Predsjedavajući je konstatirao da će to biti tačka 5. dnevnog reda.

Prijedlog poslanika Mirsada Đonlagića za dopunu dnevnog reda tačkom koja glasi: „Zahtjev za podnošenje ostavke predsjedavajućeg Šefika Džaferovića“ nije usvojen – 10 glasova „za“ (iz Federacije BiH četiri, iz Republike Srpske šest), 27 glasova „protiv“ i dva glasa „suzdržan“.

Prijedlog poslanika iz Kluba SNSD-a: Staše Košarca, Lazara Prodanovića, Nikole Špirića, Milice Marković, Miroslava Milovanovića, Dušanke Majkić i Jovana Vukovljaka za dopunu dnevnog reda tačkom koja glasi: „Odluka o razrješenju poslanika Šefika Džaferovića s dužnosti predsjedavajućeg Predstavničkog doma Parlamentarne skupštine BiH – člana Kolegija Predstavničkog doma“ nije usvojen – šest glasova „za“ (iz Republike Srpske), 32 glasa „protiv“ i jedan glas „suzdržan“.

Nakon glasanja Staša Košarac, predsjedavajući Kluba poslanika SNSD-a, rekao je da će poslanici iz ovog kluba napustiti sjednicu, a da će Klub i rukovodstvo stranke donijeti konačnu odluku o tome kako će postupati u narednom periodu.

Predsjedavajući je konstatirao da 3. sjednica Predstavničkog doma ima sljedeći

DNEVNI RED

1. Usvajanje Zapisnika 2. sjednice Predstavničkog doma Parlamentarne skupštine BiH;
2. Prijedlog zakona o izmjenama i dopunama Zakona o plaćama i drugim naknadama u sudskim i tužilačkim institucijama na nivou BiH, predlagatelj: Vijeće ministara BiH, zakon broj: 01,02-02-1-31/14, od 22.7.2014. (drugo čitanje);
3. Izvještaj o radu Upravnog odbora Izvozno-kreditne agencije BiH za 2013. godinu, akt broj: 01,02-50-19-491/14, od 7. 4. 2014. i akt broj: 01/3-50-19-491/14, od 1. 9. 2014.;
4. Prijedlog rezolucije o Sutorini, predlagatelj: poslanik Denis Bećirović, broj: 01-02-2-1440/14, od 24.12.2014.;
5. Razmatranje pritisaka na slobodu informiranja i slobodu medija u Bosni i Hercegovini s posebnim osvrtom na policijski pretres i blokiranje redakcije portala *klix.ba*, predlagatelj: poslanik Denis Bećirović, broj: 01-50-1-1263/14, od 15.1.2015.;
6. Davanje saglasnosti za ratifikaciju Sporazuma o grantu IPA EK (Projekat zaštite kvaliteta voda: Postrojenje za prečišćavanje otpadnih voda Mostar) između Bosne i Hercegovine i Međunarodne banke za obnovu i razvoj, broj: 01,02-05-2-1062/14, od 26. 9. 2014.;
7. Davanje saglasnosti za ratifikaciju Sporazuma o finansiranju (Projekat zaštite od poplava Drine) između Bosne i Hercegovine i Međunarodne asocijacije za razvoj, broj: 01,02-05-2-1112/14, od 13.10.2014.;
8. Davanje saglasnosti za ratifikaciju Sporazuma o zajmu između Bosne i Hercegovine i OPEC-ovog Fonda za međunarodni razvoj (OFID) za projekat Autoputa na Koridoru 5c poddionica Klopče - Donja Gračanica (komponenta A), broj: 01,02-05-2-1126/14, od 17.10. 2014.;

9. Davanje saglasnosti za ratifikaciju Sporazuma o zajmu između Bosne i Hercegovine i OPEC-ovog Fonda za međunarodni razvoj (OFID) za projekat Autoputa na Koridoru 5c poddionica Klopče - Donja Gračanica (komponenta B), broj: 01,02-05-2-1125-2/14, od 3.12.2014. (*ispravljeni tekst Sporazuma*);
10. Davanje saglasnosti za ratifikaciju Sporazuma o zajmu i projektu između KfW, Frankfurt na Majni (KfW), i Bosne i Hercegovine, koju zastupa Ministarstvo finansija i trezora BiH (zajmoprimalac), i Federacije Bosne i Hercegovine, koju zastupa Federalno ministarstvo finansija (Federacija), i općina Tuzla i Zenica (agencija za realizaciju projekta), za iznos od 11.000.000,00 eura – *Program vodosnabdijevanja i kanalizacije u Bosni i Hercegovini II*, broj: 01,02-05-2-1139/14, od 22.10.2014.;
11. Davanje saglasnosti za ratifikaciju Sporazuma o grantu između Bosne i Hercegovine i Razvojne banke Vijeća Evrope u vezi s regionalnim stambenim programom – BiH 1 (2013), broj: 01,02-05-2-1140/14, od 22.10.2014.;
12. Davanje saglasnosti za ratifikaciju Sporazuma o finansiranju između Bosne i Hercegovine i Evropske unije, koju predstavlja Evropska komisija u vezi s državnim programom za 2013. godinu u okviru Instrumenta pretprijetne pomoći, broj: 01,02-05-2-1181/14, od 6.11.2014.;
13. Davanje saglasnosti za ratifikaciju Sporazuma o grantu u okviru Nacionalnog programa IPA 2010 za Bosnu i Hercegovinu Dio 2 – Vodovod i kanalizacija u Republici Srpskoj – između Bosne i Hercegovine i Evropske investicione banke, broj: 01,02-05-2-1190/14, od 10.11.2014.;
14. Davanje saglasnosti za ratifikaciju Sporazuma o grantu Fonda za globalni okoliš (Projekat I. smanjenja okolišnog zagađenja Jadranskog mora između Bosne i Hercegovine i Međunarodne banke za obnovu i razvoj u funkciji agencije za implementaciju Fonda za globalni okoliš, broj: 01,02-05-2-1243/14, od 26.11.2014.;
15. Davanje saglasnosti za ratifikaciju Sporazuma o finansiranju (Projekat energetske efikasnosti) između Bosne i Hercegovine i Međunarodne asocijacije za razvoj, broj: 01,02-05-2-1249/14, od 27.11.2014.;
16. Davanje saglasnosti za ratifikaciju Ugovora broj 1 o Amandmanu na Ugovor o garanciji potpisan 23. 7. 2010. između Bosne i Hercegovine i Evropske banke za obnovu i razvoj, broj: 01,02-05-2-1067/14, od 26. 9. 2014.;
17. Davanje saglasnosti za ratifikaciju Devetog amandmana na Ugovor o bespovratnim sredstvima između Bosne i Hercegovine i Sjedinjenih Američkih Država za program poslovnog razvoja, 01,02-05-2-1179/14, od 6.11.2014.

Nakon što je predsjedavajući pročitao dnevni red, poslanik Mirsad Đonlagić, predsjedavajući Kluba poslanika SBB-a BiH, rekao je da će poslanici iz ovog kluba napustiti sjednicu jer njihov prijedlog nije prihvaćen, a da će o daljnjim aktivnostima informirati predsjedavajućeg.

Predsjedavajući je konstatirao da postoji kvorum za rad i odlučivanje, te je nastavio sjednicu po tačkama dnevnog reda.

Ad. 1. Usvajanje Zapisnika 2. sjednice Predstavničkog doma Parlamentarne skupštine BiH

Predsjedavajući je rekao da je poslanicima dostavljen Zapisnik.

Nije bilo primjedbi na Zapisnik.

Zapisnik 2. sjednice usvojen je jednoglasno, s 28 glasova "za" (iz Federacije BiH 23, iz Republike Srpske pet).

Ad. 2. Prijedlog zakona o izmjenama i dopunama Zakona o plaćama i drugim naknadama u sudskim i tužilačkim institucijama na nivou BiH, predlagač: Vijeće ministara BiH, zakon broj: 01,02-02-1-31/14, od 22.7.2014. (drugo čitanje)

Predsjedavajući je dao uvodne napomene.

U okviru ove tačke diskutirao je Salko Sokolović.

„Za“ Prijedlog zakona glasao je 21 poslanik (iz Federacije BiH 20, iz Republike Srpske jedan), „protiv“ pet i dva su bila „suzdržana“. Predsjedavajući je konstatirao da nema potrebne entitetske većine i da će Kollegij Doma kao komisija obaviti naknadno usaglašavanje o Prijedlogu zakona o izmjenama i dopunama Zakona o plaćama i drugim naknadama u sudskim i tužilačkim institucijama na nivou BiH u drugom čitanju.

(Napomena: U Izvještaju Komisije za finansije i budžet sadržan je amandman na Prijedlog zakona, koji je postao njegov sastavni dio, kao i prijedlog zaključka, o kome će se Dom izjasniti nakon glasanja o Prijedlogu zakona u drugom krugu.

Amandman glasi: U članu 1. Prijedloga zakona o izmjenama i dopunama Zakona o plaćama i drugim naknadama u sudskim i tužilačkim institucijama na nivou Bosne i Hercegovine, stav 3. mijenja se i glasi: „3. Sudije i tužioci imaju pravo na naknadu za godišnji odmor u skladu s podzakonskim aktom koji donosi Vijeće ministara Bosne i Hercegovine, shodno odredbama Zakona o plaćama i naknadama u institucijama BiH („Službeni glasnik BiH“, br. 50/08, 35/09, 75/09, 32/12, 42/12, 50/12, 32/13 i 87/13).“

Prijedlog zaključka glasi: Predstavnički dom Parlamentarne skupštine BiH zadužuje Vijeće ministara BiH da izradi Prijedlog zakona o izmjenama i dopunama Zakona o plaćama i drugim naknadama u sudskim i tužilačkim institucijama na nivou Bosne i Hercegovine, kojim bi se izjednačio iznos novčane naknade koje prima zaposleno stručno osoblje u sudskim i tužilačkim institucijama na nivou Bosne i Hercegovine po osnovu prava na regres za godišnji odmor sa iznosom novčane naknade po osnovu prava na regres za godišnji odmor koji primaju zaposleni u institucijama Bosne i Hercegovine, u skladu sa Zakonom o plaćama i naknadama u institucijama BiH.)

Ad. 3. Izvještaj o radu Upravnog odbora Izvozno-kreditne agencije BiH za 2013. godinu, akt broj: 01,02-50-19-491/14, od 7. 4. 2014. i akt broj: 01/3-50-19-491/14, od 1. 9. 2014.

Predsjedavajući je dao uvodne napomene.

U raspravi su učestvovali: Šemsudin Mehmedović, Borislav Bojić, Zaim Backović, Diana Zelenika i Lamija Kozarić-Rahman, direktorica Izvozno-kreditne agencije BiH.

Izvještaj o radu Upravnog odbora Izvožno-kreditne agencije BiH za 2013. godinu usvojen je s 25 glasova „za“ (iz Federacije BiH 19, iz Republike Srpske šest), bez glasova „protiv“ i četiri glasa „suzdržan“. Time je usvojen i zaključak sadržan u Mišljenju Komisije za vanjsku trgovinu i carine, koji glasi: *„Zadužuje se Izvožno-kreditna agencija BiH da najkasnije do 1.5.2015. obavijesti Parlamentarnu skupštinu BiH o svim mjerama i radnjama koje su preduzete s ciljem otklanjanja teškoća i osiguranja potrebnih preduslova za normalan rad Izvožno-kreditne agencije BiH.“*

Ad. 4. Prijedlog rezolucije o Sutorini, predlađač: poslanik Denis Bećirović, broj: 01-02-2-1440/14, od 24.12.2014.

Predsjedavajući je dao uvodne napomene.

U raspravi su učestvovali: Denis Bećirović, Aleksandra Pandurević, ministar vanjskih poslova BiH Zlatko Lagumdžija, Hanka Vajzović, Borjana Krišto, Vjekoslav Bevanda, Šefik Džaferović, Nikola Lovrinović i Zaim Backović.

Na prijedlog poslanice Aleksandre Pandurević, s 28 glasova „za“ (iz Federacije BiH 22, iz Republike Srpske šest), bez glasova „protiv“ i jednim glasom „suzdržan“, usvojeni su sljedeći zaključci:

1. *„Zadužuje se Ustavnopravna komisija Predstavničkog doma da do 27.2.2015. organizira javnu raspravu o pitanju statusa Sutorine i Predstavničkom domu dostavi zaključke s rasprave.“*
2. *Odgoda se izjašnjavanje o Prijedlogu rezolucije o Sutorini do okončanja javne rasprave, do kada se produžava i amandmanska faza.“*

Prijedlog zaključaka poslanika Saše Magazinovića nije usvojen. „Za“ je glasalo 18 poslanika (iz Federacije BiH 17, iz Republike Srpske jedan), „protiv“ sedam, a tri poslanika su bila „suzdržana“. Predsjedavajući je konstatirao da nema potrebne entitetske većine i da će Kolegij Doma kao komisija obaviti usaglašavanje o prijedlogu zaključaka poslanika Saše Magazinovića koji glase:

„Polazeći od principa da tuđe nećemo, a svoje ne damo, u skladu s Ustavom BiH i međunarodnim pravom, imajući za primarni cilj očuvanje suvereniteta, teritorijalnog integriteta i cjelovitosti naše zemlje, Predstavnički dom PSBiH konstatira:

1. *Izvještaj Badinterove komisije je neupitan dio međunarodnog prava sa snagom međunarodne presude, te kao jedan od temelja Dejtonskog mirovnog sporazuma ima pravo prvenstva nad drugim aktima te vrste, čime se garantira neupitnost teritorijalnog integriteta i cjelovitosti BiH u njenim međunarodno priznatim granicama.*
2. *Zadužuje se novo Vijeće ministara BiH da, zajedno s Državnom komisijom za granice, napravi tri sveobuhvatne, primarno pravne, ekspertne analize, s posljedicama po interese BiH, sa stanovišta očuvanja njenih međunarodno priznatih granica sa Crnom Gorom, Srbijom i Hrvatskom. Na tim osnovama Predstavnički dom organizirat će javnu raspravu s ciljem potpisivanja sporazuma o državnim granicama sa susjedima.“*

Ad. 5. Razmatranje pritisaka na slobodu informiranja i slobodu medija u Bosni i Hercegovini s posebnim osvrtom na policijski pretres i blokiranje redakcije portala klix.ba, predlagač: poslanik Denis Bećirović, broj: 01-50-1-1263/14, od 15.1.2015.

Nakon uvodnih napomena predsjedavajućeg, u raspravi su učestvovali: Denis Bećirović, Šemsudin Mehmedović, Senad Šepić, Aleksandra Pandurević, Zaim Backović, Borjana Krišto, Damir Bećirović, Saša Magazinović, Mladen Bosić i Šefik Džaferović.

U raspravi zaključke su predložili: Denis Bećirović, Senad Šepić i Aleksandra Pandurević.

Prijedlog zaključaka poslanika Denisa Bećirovića usvojen je s 25 glasova „za“ (iz Federacije BiH 19, iz Republike Srpske šest), bez glasova „protiv“ i četiri glasa „suzdržan“.

Prijedlog zaključka poslanika Senada Šepića usvojen je s 24 glasa „za“ (iz Federacije BiH 18, iz Republike Srpske šest), bez glasova „protiv“ i četiri glasa „suzdržan“.

Prijedlog zaključka poslanice Aleksandre Pandurević usvojen je s 25 glasova „za“ (iz Federacije BiH 19, iz Republike Srpske šest), bez glasova „protiv“ i četiri glasa „suzdržan“.

Usvojeni zaključci glase:

1. *„Predstavnički dom PSBiH prihvata ocjene sadržane u saopćenju Vijeća za štampu BiH od 29.12.2014.*
2. *Predstavnički dom PSBiH zadužuje Vijeće ministara BiH da najkasnije u roku od 30 dana dostavi na razmatranje cjelovitu informaciju o pojavama pritisaka i zastrašivanja medija u BiH.*
3. *Predstavnički dom PSBiH obavezuje Vijeće ministara BiH i druge nadležne institucije u BiH da najmanje dva puta godišnje obavezno pripreme i Parlamentarnoj skupštini BiH dostave informaciju o stanju i slobodi medija u BiH.*
4. *Poziva se Agencija za forenzička ispitivanja i vještačenja da utvrdi autentičnost audiosnimka afere „dva papka“ (snimak premijerke RS-a o kupovini poslanika) i o rezultatima obavijesti javnost i nadležne istražne institucije.“⁶*

Ad. 6. – 17.

Prije prelaska na tačku 6., predsjedavajući je stavio na glasanje prijedlog da se objedini rasprava o tačkama od 6. do 17., s obzirom na to da je riječ o davanju saglasnosti za ratifikaciju materijala iz ovih tačaka. Prijedlog je prihvaćen jednoglasno, s 27 glasova „za“ (iz Federacije BiH 21, iz Republike Srpske šest).

Nije bilo rasprave o ovim tačkama.

Dom je jednoglasno, s 29 glasova „za“ (iz Federacije BiH 23, iz Republike Srpske šest), odlučio da se objedini glasanje o tačkama od 6. do 17.

Saglasnost za ratifikaciju materijala iz tačaka od 6. do 17. data je jednoglasno - s 29 glasova „za“ (iz Federacije BiH 23, iz Republike Srpske šest).

⁶ Zaključci br. 1. i 2. usvojeni su na prijedlog Denisa Bećirovića, zaključak br. 3. na prijedlog Senada Šepića, a zaključak br. 4 na prijedlog Aleksandre Pandurević.

Sjednica je završena u 17,35 sati.

Sastavni dio Zapisnika je transkript 3. sjednice Predstavničkog doma.

SEKRETAR
PREDSTAVNIČKOG DOMA
mr. sc. Dragoljub Reljić

PREDSJEDAVAJUĆI
PREDSTAVNIČKOG DOMA
Šefik Džaferović